


ՀԱՅԲԱՊԵՏԱԿԱՆ
ԿՈՆԳՐԱԿՆԵՐ



ՕՐՀՆՈՒԹԵԱՆ
ԳՐԵՐ

Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՅ ԿԱԹՈՂԻԿՈՍԻ ՊԱՏԳԱՍԸ
ԵՊԻՍԿՈՊՈՍԱԿԱՆ ԶԵՌՆԱԴՐՈՒԹՅԱՆ ԱՌԻԹՈՎ

(Սուրբ էջմիածին, 3 նոյեմբերի, 2024 թ.)

Յանուն Հօր եւ Որդւոյ եւ Հոգւոյն Սրբոյ. ամէն:

«Մարդու Որդին չեկավ ծառայություն
ընդունելու, այլ ծառայելու»

(Մատթ. Ի. 28):

Միրելի՛ բարեպաշտ հավատացյալներ,

Փառք եւ գոհություն ենք մատուցում Ամենակարող Աստծուն, որ Միածնաէջ Մայր Տաճարի վերածման եւ Սրբալույս Մյուռոնի օրհնության հոգենորոգ արարողություններից մեկ ամիս անց Մեզ շնորհեց խնդրության նոր բարեպատեհ առիթ: Յնծում է այսօր մեր Սուրբ Եկեղեցին, քանզի եպիսկոպոսաց դասը համալրում ունեցավ նորաօծ Սրբազաններով, ովքեր տարիների ծառայության գովելի վաստակ ունեն ազգային-եկեղեցական մեր անդաստանում: Այսօր համախմբված այս սուրբ կամարների ներքո՝ միասին խնդրենք Տիրոջ առատ շնորհները եւ երկնային զորակցությունը ձեռնադրյալներին իրենց առաքելության մեջ:

Քրիստոսի Եկեղեցին նորընծա եպիսկոպոսներով միշտ զորանում է, քանզի նրանց նվիրյալ ծառայությունը շինություն ու պայծառություն է հավելում եկեղեցական կյանքին, օրհնություն եւ մխիթարություն պարգևում հավատացյալներին՝ առաջնորդելով երկնային վարձատրության արժանի բարի գործերի: Ուստի, այս իրադարձությունը նշանակալի է ոչ միայն նորոգ ձեռնադրյալների, այլեւ հավատացելոց համար, ինչպես

եռամեծ վարդապետ Սուրբ Գրիգոր Տաթևացին է հաստատում, Եկեղեցին Աստծո քաղաքն է, որին խնամք տանելու է կոչված եպիսկոպոսը:

Ծանր է բեռը եպիսկոպոսի, դժվարին է ու պատասխանատու նրա առաքելությունը: Եպիսկոպոսի բարձր հանգամանքը ոչ թե փառքի դափնիներով զարդարուն կյանք է ենթադրում, այլ խոնարհ եւ ժուժկալ սպասավորություն, հաճախ նաեւ անձնագոհություն՝ մեր Տիրոջ նմանությունամբ: «Մարդու Որդին չեկավ ծառայություն ընդունելու, այլ ծառայելու»՝ Իր օրինակով այս ուսուցանեց մեր Փրկիչ Հիսուս Քրիստոս՝ ուղենշելով նաեւ Սուրբ Եկեղեցու սպասավորների առաքելությունը: Հանձնառության այսպիսի ոգին է խրախուսյան ու շարժիչ ուժը տերունավանդ հոգեւոր ծառայություն ստանձնած բոլոր հոգեւորականների համար:

Եպիսկոպոսը հայր է, ով կոչված է սիրով եւ ջանադրությամբ հոգատարելու իր հոգեւոր զավակներին, Ավետարանի անհոգնաբեկ քարոզչությամբ արթուն ու զորեղ պահելու նրանց հավատքն ու աստվածսիրությունը, խարսխելու նրանց կյանքը հոգեւոր արժեքների վրա, նաեւ ի հարկին հանդիմանելու, նախազգուշացնելու վտանգների մասին ու զերծ պահելու մեղսալի եւ կործանարար ընթացքներից:

Եպիսկոպոսը տեսուչ է՝ կոչված նախանձախնդրորեն հետեւելու ուղղափառ հավատի անաղարտ պահպանությանը, մեր Սուրբ Եկեղեցու կարգաց եւ կանոնաց հարգմանը, իր շնորհներն ու կարողությունները ծառայեցնելու տերունապատվեր հոգեփրկչական առաքելությանը, հսկելու եւ կարգավորելու իր իշխանության ներքո գործող եկեղեցականների ծառայությունը, օժելու եկեղեցիներ, ձեռնադրելու հոգեւոր նոր սպասավորներ:

Եպիսկոպոսը առաջնորդ է, ում անդրանիկ պարտականությունն է Կենաց խոսքի ուսուցմամբ քրիստոսապատվեր շավիղներով առաջնորդել հավատացյալներին, նաեւ փորձություններով լեցուն այս աշխարհում խիզախաբար պայքարել իր հավատավոր հոտի իրավունքների համար: Եպիսկոպոսը կոչված է մեր Տիրոջ պես լինել քաջ հովիվ, ով, առաքյալի խոսքով, «Իր անձը տվեց մեզ համար, որպեսզի մեզ փրկի ամեն անօրենությունից եւ մաքրի որպես Իրեն սեփական ժողովուրդ՝ նախանձախնդիր բարի գործերի» (Տիտ. Բ. 14):

Եպիսկոպոսը սպասավոր է, սիրելիներ, կոչված միշտ ականջալուր եւ խնամարկու լինելու հավատացելոց հոգեւոր կարիքներին ու պետքերին, քանզի, Տիրոջ խոսքի համաձայն, «Երանելի է մանավանդ տալը, քան առնելը» (Գործք Ի. 35):

Հիրավի, մեր պատմությունը հարուստ է բազում վկայություններով, թե ինչպես են եպիսկոպոսները Հայոց Հայրապետների գլխավորությամբ անձնդիր գործել մեր ազգի հոգեւոր խնամքի եւ փրկության, հայորդյաց սրտերում հավատքի, հայրենասիրության ու ազգանվիրումի զորացման, մեր հայրենիքի, համայն մեր ժողովրդի ապահով կյանքի, առաջընթացի ու բարօրության համար:

Անշուշտ, պատմական փոթորկալի զարգացումները, աշխարհաքաղաքական ծանր իրողությունները հաճախ մեր ազգին կանգնեցրել են երբեմն անհաղթահարելի եւ անդառնալի թվացող կորուստների եւ ծանր հիմնախնդիրների առջեւ, որոնցից անմասն չի եղել նաեւ Հայոց Եկեղեցին: Այսօր եւս մեր ժողովուրդն ու երկիրը գտնվում են լրջագույն մարտահրավերների հանդիման, հայրենական անդաստանում արդարությունն ու ճշմարտասիրությունը զորացնելու, համազգային միաբանությունը հաստատուն պահելու եւ անկախ պետականությունը անսասան պահպանելու անհրաժեշտության առջեւ: Տիրող դժվարին իրադրությունը զուգընթաց տարատեսակ վնասակար գաղափարախոսությունների տարածմամբ մեր հասարակության մեջ փորձ է արվում նսեմացնել մեր Սուրբ Եկեղեցու պատմական առաքելության եւ քրիստոնեական արժեքների կարեւորությունը, ընտանիքի ավանդական ընկալումը, խարխիւլ ազգային համերաշխության հիմքերը:

Նման տագնապալի պայմաններում հարկ է Տիրոջ օգնականությամբ բազմապատկել հոգեւորականներին եւ եկեղեցական կառույցների ջանքերը՝ ի նպաստ վիրավոր մեր հայրենյաց եւ ժողովրդի առջեւ ծառայած խնդիրների արժանապատիվ հաղթահարման, ազգային ոգու զորացման, այլեւ լուսավոր մեր նախնյաց կողմից ավանդված արժեհամակարգին եւ պատմական նվիրական հիշատակներին հավատարիմ՝ մեր ինքնության անխաթար պահպանման:

Նորօծյալ եպիսկոպոսները, այսօր նորոգելով հոգեւոր ծառայության իրենց ուխտը, պատասխանատվության են կոչվում այսպիսի դժվարին ժամանակներում՝ արիաբար դիմակայելու առկա փորձություններին եւ մեր Սուրբ Եկեղեցու դեմ արտահայտվող մերժելի երեւույթներին ու դրսեւորումներին:

Այժմ, սիրելիներ, ձեզ ենք ներկայացնում մեր նորօծյալ եպիսկոպոսներին:

Տ. Առեն եպիսկոպոս Շահենյան, ծնվել է Իրաքի մայրաքաղաք Բաղդադում: Հոգեւոր կրթություն ստացել է Իրաքի Բաբելոնի համալսարանում,

Հոռմի Պապական արեւելյան ինստիտուտում, հովվական ծառայություն իրականացրել Իտալիայում, Հոլանդիայում, Գեղարքունյաց, Արագածոտնի եւ Մեծ Բրիտանիայի հայոց թեմերում: Ներկայիս պաշտոնավարում է որպէս Արգենտինայի եւ Զիլիի հայոց թեմի առաջնորդ:

Տ. Գրիգոր եպիսկոպոս Խաչատրյանը ծնվել է Սեւան քաղաքում: Գեւորգյան հոգեւոր ճեմարանում ուսումնառությունից հետո, ձեռնադրվելով կուսակրոն եկեղեցական, սպասավորություն է անցել Գեղարքունյաց թեմում, ապա ծառայության նշանակվել Մայր Աթոռի Քրիստոնեական դաստիարակության կենտրոնում: Այնուհետ հոգեւոր ուսումնառությունը կատարելագործել է Փարիզի Կաթոլիկ համալսարանում եւ հովվական ծառայության անցել Ֆրանսիայի հայոց թեմում, ապա Թեմական-պատգամավորական ժողովի կողմից ընտրվել Ֆրանսիայի հայոց թեմի առաջնորդ եւ իր ծառայությունն է բերում այդ հանգամանքում:

Տ. Նարեկ եպիսկոպոս Ավագյան, ծնունդով Օշական գյուղից է: Ավարտել է Գեւորգյան հոգեւոր ճեմարանը, պատասխանատու ծառայություններ բերել Մայր Աթոռում, եղել Խոր Վիրապի վանահայր, նաեւ հոգեւոր հովիվ Աբխազիայում, Իրաքում, այնուհետ ստանձնել Արթիկի թեմի առաջնորդական տեղապահի պաշտոնը: Այժմ Արթիկի թեմի առաջնորդն է:

Տ. Մակար եպիսկոպոս Հակոբյան, Գյումրի քաղաքից է, քահանայի գավակ: Սովորել է Շիրակի թեմի հոգեւոր ընծայարանում եւ Գեւորգյան հոգեւոր ճեմարանում, ապա ծառայության կոչվել Մայր Աթոռում, եղել է Տավուշի թեմի Նոյեմբերյանի համայնքի հոգեւոր հովիվ, այնուհետ Գոշավանքի եւ Սուրբ Գայանե վանքերի վանահայր: Ներկայումս պաշտոնավարում է որպէս Սյունյաց թեմի առաջնորդ:

Տ. Պարթեւ եպիսկոպոս Բարսեղյան, ծնվել է Էջմիածին քաղաքում: Գեւորգյան հոգեւոր ճեմարանի շրջանավարտ է, պաշտոնավարել է Մայր Աթոռում, Սեւանի Վազգենյան դպրանոցում, եղել է Մայր Աթոռի փոխդիվանապետ, այնուհետեւ մեկնել է ծառայության Ֆրանսիայի հայոց թեմ: Այժմ Գեղարքունյաց թեմի առաջնորդն է:

Տ. Խորեն եպիսկոպոս Առաքելյան, Կոտայքի մարզի Արգել գյուղից է: Սովորել է Երեւանի Պետական համալսարանի բանասիրության ֆակուլտետում, այնուհետ Գեւորգյան հոգեւոր ճեմարանում, ծառայություն է բերել Մայր Աթոռում, հովվական սպասավորության կոչվել Հունաստանի հայոց թեմ, ապա նշանակվել նույն թեմի առաջնորդական տեղապահ: Ներկայումս Հունաստանի հայոց թեմի առաջնորդն է:

Միրելի Սրբազան Հայրեր, Հայրապետական Մեր պատգամն է ձեզ՝ որպես Աստծո հավատարիմ մշակներ քաջ ու հետեւողական լինել մեր հավատի պաշտպանութեան մեջ, մշտարթուն հովվել ու խնամել Տիրոջ հոտը: «Հիշեցնում եմ քեզ, որ վերարժարժես Աստծու շնորհը, որ տվեցի քեզ՝ իմ ձեռքերը դնելով քեզ վրա, որովհետեւ Աստված մեզ երկշտուութեան ոգի շտվեց, այլ՝ զորութեան, սիրո եւ զգաստութեան» (Բ. Տիմ. Ա. 6–7): Առաքյալի այս խոսքերով հայրական Մեր հորդորն է յուրաքանչյուրիդ՝ բոլորանվեր ծառայել մեր ժողովրդին, առաջնորդելով ապրելու աստվածադիր պատվիրաններով եւ հավատարիմ մեր երանյալ հայրերի ավանդներին, որպեսզի հոգեւոր արժեքների պայծառութեամբ ամուր եւ աներեր մնա մեր ժողովրդի հավատը, որով պիտի եւ իրականութեան դարձնենք մեր ազգի իղձերն ու երազները: Զեր գործերում եւ վճիռներում միշտ առաջնորդվեք Քրիստոսի օրինակով եւ ձեր ընթացքով բարի օրինակ ծառայեք հավատացելոց համար՝ հիշելով, որ Աստված է գործում ձեր մեջ եւ ձեր միջոցով: Ուստի, աննկուն եւ հաստատակամ մնացեք՝ մեր զավակաց կյանքում հավատքի, հույսի եւ սիրո առատացման պարտականութեան մեջ: Առ Տերն ապավինութեամբ արդյունավորեք առաջնորդական ձեր գործունեությունը՝ ի բարգավաճում տիրախնամ թեմերի, ի պայծառացում եւ ի զորացում հայրենիքի եւ ազգային-եկեղեցական կյանքի:

Հայրապետական սիրով եւ օրհնությամբ Մեր գնահատանքն ենք բերում բոլոր հավատավոր հայորդիներին, որոնք աջակից են մեր թեմակալ առաջնորդներին ու հոգեւոր դասին եւ սատար են թեմական կյանքի շինութեանն ու առաջընթացին:

Աղոթում ենք առ Ամենակալն Աստված, որ խաղաղութեան շնորհի ողջ աշխարհին ու մեր հայրենիքին եւ իր Սուրբ Աջի հովանու ներքո անվտանգութեան ու բարօրութեան մեջ պահի համայն մեր ժողովրդին ի հայրենիս եւ ի սփյուռս: Թող շնորհը, սերը եւ ողորմությունը մեր Տեր Հիսուս Քրիստոսի լինեն մեզ հետ եւ ամենքի այսօր եւ միշտ եւ հավիտյանս. ամեն:

